

աւելի վրդովում էր ինձ, քանի մտաբերում էի իմ անպատշաճ վարմունքը Ասլանի եւ Սազոյի հետ: Իսկ նրանք, կարծես թէ, մոռացել էին բոլորը, եւ ոչ մի կերպով, եւ ոչ մի թեթեւ ակնարկութեամբ անգամ չէին յիշեցնում անցածը, այլ ընդհակառակն, պատմում էին Յասօին՝ իմ եւ Մարօի կռիւը դաբանի հետ եւ գովասանում էին մեր քաջասրտութիւնը: Իսկ նրանց մի այսպիսի ներողամտութիւնը աւելի ծանր էր ինձ համար. ինձ բոլորովին վիրաւորական էր թւում վշտացնել մէկին, եւ առանց փոխադարձ բաւականութիւն տալու, վայելել նրա ներողամտութիւնը: Այդ մի տեսակ ողորմութիւն էր, իսկ ողորմութիւն խնդրել եւ չէի ուզում:

Ընթրիքի սեղանը կազմուել էր տաղաւարի մէջ, տղերքը հաւաքուել էին այնտեղ. եւ պառկել էի տաղաւարից դուրս խոտերի վրայ, մի քանի քայլով միայն հեռու նրանցից, այնպէս որ, նրանց խօսակցութիւնը լսելի էր ինձ:

– Շշմարի՞տ, հիւանդ է նա, – հարցրուց Յասօն:

– Չէ՛, նա ուրիշ փորացաւ ունի... – պատասխանեց Սազօն եւ մօտեցաւ ինձ, գիտով լիքը երկու բաժակներ ձեռին, եւ երգելով մի գեղեցիկ երգ: Տաղաւարի միջից միաձայն հնչեցին ամբողջ խորով նրա շարունակութիւնը:

Գիշերային լռութեան պահուն, երկրագործի մենաւոր տաղաւարի մէջ, մանկահասակ պատանիների ջերմ եւ անկեղծ սրտերից դուրս բխած հնչիւնները այնքան հոգեշարժ եւ ոգեւորիչ էին, որ ներգործեցին իմ վրայ ընկերասիրութեան բոլոր սուրբ եւ կենսագործող զօրութեամբ: Իմ սիրտը լցոնեց մի սրբազան խաղաղութեամբ, եւ դադարեց մրրիկը, որ այնպէս սաստիկ կերպով խռովում էր ինձ: Ես չկարողացայ պահել իմ արտասուքը, եւ ընդունելով Սազօյի ձեռքից բաժակը, միասին մօտեցանք խմբին: Նրանք նոյնպէս մի-մի բաժակ ձեռքերին, կանգնած, բոլորել էին սեղանի շուրջը: Կարօն խիստ հանդարտ եւ ծանր եղանակով կարդաց մի փոքրիկ ճառ: Բայց նրա խօսքերը, որոնք այնպէս ազդու եւ զօրեղ կերպով դուրս էին հոսում, մինչ այն աստիճան ներգործեցին իմ վրայ, որ ես մինչեւ այսօր չեմ մոռացել, թէ եւ այն օրից անցել է յիսուն տարի, այո՛, յիսուն տարի, դա քիչ չէ...

«Սիրելի՛ ընկերներ, մենք այն ազգի որդիքն ենք, որ զրկուելով հայրենական հողից, ցրոած է աշխարհի զանազան անկիւններում: Մենք մի այնպիսի ժողովրդի ծնունդ ենք, որ ապրում է մի երկրում, ուր նրա խրճիթի օջախը շատ քիչ անգամ տաքանում է կրակով, որովհետեւ նա վառելիք չունի, որի տան մէջ լոյս չկայ արեւը մտնելէն յետոյ, որովհետեւ նրա ճրագի իւրը վաղուց սպառուել է, որի որդիքը գիշերը քաղցած են քնում, որովհետեւ նա տանը հաց չունի: Արեւն այրում է նրա զաւակների մարմինը, ցուրտը սառեցնում է, անձրեւը թոջում է, որովհետեւ նրանց հագուստներն այնքան քրքրո-